



## PM nikmati Menu Siswa Rahmah, serendah RM3.50

Oleh **Mohd Nasaruddin Parzi** - Mac 17, 2023 @ 3:05pm  
[bhnews@bh.com.my](mailto:bhnews@bh.com.my)

BANGI: Perdana Menteri, Datuk Seri Anwar Ibrahim, hari ini mencuba sendiri Menu Siswa Rahmah, yang diperkenalkan di institusi pengajian tinggi, bagi meringankan beban mahasiswa.

Anwar dilihat mencuba beberapa menu yang disediakan di Kafeteria Randau Rasa, Universiti Kebangsaan Malaysia (UKM), di sini, antaranya ikan keli sambal, sayur dan ikan goreng.

Selain wakil pelajar, Perdana Menteri turut ditemani Naib Canselor UKM, Prof Datuk Dr Mohd Ekhwan Toriman serta barisan kepimpinan tertinggi dan pengurusan universiti.

Turut hadir, Timbalan Menteri Pendidikan Tinggi, Datuk Mohammad Yusof Apdal; Pengerusi Lembaga Pengarah UKM, Prof Emeritus Datuk Dr Mohamad Abd Razak dan Ketua Setiausaha Kementerian Pendidikan Tinggi (KPT), Datuk Seri Abdul Razak Jaafar.

Menu Siswa Rahmah adalah inisiatif KPT, dengan sajian pada harga serendah RM3.50, yang ditawarkan di 20 universiti awam (UA) seluruh negara serta politeknik.

Inisiatif itu memberi manfaat kepada kira-kira 320,000 pelajar UA daripada kumpulan keluarga B40.

Selesai menjamu selera, Anwar menyertai kira-kira 2,000 jemaah, termasuk warga UKM menunaikan solat Jumaat di Masjid UKM, yang terletak kira-kira 500 meter dari Kafeteria Randau Rasa.

Khutbah hari ini bertajuk 'Ekstremis Agama', disampaikan oleh Pensyarah Fakulti Pengajian Islam UKM, Dr Hamidi Ishak, yang turut mengimamkan solat Jumaat.

Usai solat Jumaat, Perdana Menteri meluangkan masa bersalaman dan beramah mesra dengan jemaah yang hadir, sebelum beredar meninggalkan masjid, tanpa kenyataan kepada media.



Perdana Menteri, Datuk Seri Anwar Ibrahim, menikmati Menu Siswa Rahmah bersama lebih 150 mahasiswa Universiti Kebangsaan Malaysia (UKM) Bangi di Kafeteria Randau Rasa, UKM, hari ini. - Foto BERNAMA